

四庫全書

子部

欽定四庫全書

子部
書史會要
卷六至
補遺

詳校官中書臣孫溶

編修臣程嘉謨覆勘

總校官進士臣朱鈺

校對官中書臣陸湘

騰錄監生臣王禮

欽定四庫全書

書史會要卷六

明 陶宗儀 撰

宋

太祖趙氏諱匡胤涿州人仕後周殿前都檢點受禪即
帝位以英武之姿開文明之運嘗有所書詩數幅天
下一統四大字處分手札楷書三行傳世人知寶愛
子孫代以文薄昭回雲漢有自來矣

太宗諱炅太祖弟載橐弓矢垂意翰墨真草八法
草入三昧行書無對飛白入神評者又謂行草可
逼盛唐但短於風韻耳嘗出御府所藏歷代真蹟
命侍書王著臨搨刻板禁中世謂之淳化閣帖者
是也

真宗諱恒太宗子善書甚得晉人風度評者以為妙在
全備八法

仁宗諱禎真宗第六子天德純粹無聲色畋游之好平

居時御翰墨特喜飛白體執道勁可入能品

英宗諱曙太宗曾孫濮安懿王子仁宗立為子善書

神宗諱頊英宗子厲精求治尤工筆札

哲宗諱煦神宗子元祐之治為盛翰墨亦佳

徽宗諱佶哲宗弟萬幾之餘翰墨不倦行草正書筆執勁逸初學薛稷變其法度自號瘦金書要是意度天成非可以陳迹求也

荆恭肅王元儼太宗第八子少竒穎寡嗜慾惟喜聚書

好為文辭頗善二王書工飛白

吳榮王顥字仲明英宗次子天姿穎異尤嗜學古圖書
工飛白

益端獻王顥英宗第四子資表秀拔眉宇如畫貫通經
傳留心翰墨飛白篆籀皆造其妙

冀王惟吉字國祥太祖孫燕懿王德昭子好學喜屬文
雅善草隸飛白真宗嘗次為七卷御製序命藏秘閣
慈聖光獻皇后曾氏真定人周武惠王彬之孫仁宗后

性慈儉善飛白蓋習觀昭陵落筆得其奧妙是以筆
執飛動所書用慈壽宮寶識之

欽聖憲肅皇后向氏河內人故宰相敏中曾孫神宗后
工行草

趙惟和惟吉弟雅好學為詩頗清麗工筆札

趙允寧字德之商恭靖王元份子性嗜學尤喜讀唐史
通知近朝典故工隸世南楷法

趙仲鸞濮安懿王允讓孫官至常州防禦使喜翰墨

趙仲恕字周臣宗室也能草書筆法圓美

趙令穰字大年宗室也游心經史戲弄翰墨尤工草書

嘗作小草如聚

闕

如撮鍼鐵筆道而法足觀之使

人目力茫然誠可喜也

趙士聽字明發宗室也少好學喜為文書師米芾

趙子澄字處度宗室也廡介修潔流落巴峽四十年善

草隸

李煜字重光南唐主景第六子嗣位稱後主入朝封遣

命侯改封隴西郡公卒贈太師封吳王少聰悟喜讀
書屬文工書畫其作大字不事筆卷帛而書之皆能
如意世謂撮襟書復喜作顛掣執人又目其狀為金
錯刀尤喜作行書落筆瘦硬而風神溢出然乏姿媚
或者以謂煜大字如截竹木小字如聚鍼釘似非筆
跡所為又謂筆跡不減柳誠懸其亦善評者矣又謂
善書有筆法五字厭押鉤格抵用筆雙鉤則點畫道
勁而盡善謂之撥鐙書煜得此法復增二字曰導送

方煜來歸時藝祖嘗曰煜雖有文只一翰林學士耳
此亦英偉之氣有以蓋之故其言如此

徐鉉字鼎臣揚州廣陵人仕南唐吏部尚書隨李煜入
朝官至左散騎常侍當太宗時直學士院典故命稱
得體留心隸書尤善篆與八分識者謂自李陽冰之
後續篆法者惟鉉而已人跋其書以謂筆實而字畫
勁亦似其文章至於篆籀氣質高古幾與陽冰並馳
爭先又謂鉉書映日視之中心有一縷濃墨至曲折

處亦然乃筆鋒直下不倒側故耳嘗奉詔與句中正
葛湍王惟恭等同校定許慎說文行於世鉉自謂暮
年方得蝸匾法識者然之

徐鍇字楚金鉉弟仕南唐內史舍人因鉉奉使入宋憂
懼而卒鍇亦善篆書以許慎說文依四聲譜次為十
卷目曰說文解字韻譜鉉序其首鍇又集通釋四十
篇暢許氏之玄旨正陽冰之新義皆說文之羽翼也
宋綬字公垂趙州平棘人官至參知政事謚宣獻作字

尤為時所推右嘗為小字正書整整可觀真是黃庭
經樂毅論一派之法國初稱能書者惟李建中與綬
二人建中之字肥而重濁或為時輩譏評至綬則無
間言蓋其書當於法度雖清臞而不弱亦古人所難
到也

宋敏求字次道綬子官至龍圖閣直學士書法溫厚清
峻凡當時巨卿名碣必得敏求字方以為榮

李建中字德中其先京兆人官至司封員外郎工部郎

中嘗為殿中丞掌西京留司御史臺至今謂之李西臺居洛中以林泉自娛喜篆籀草隸八分於真行尤精觀其字體初效王羲之而氣格不減徐浩當時士大夫得其書莫不爭藏以為楷法作科斗書郭忠恕汗簡集以獻頗見褒美論者以謂尚有五代衰陋之氣蓋以其作字淳厚不飄逸致然

蔡襄字君謨興化人官至端明殿學士謚忠惠博古尚氣節工字學大字鉅數尺小字如豪髮筆力位置大

者不失結密小者不失寬綽至於科斗篆籀正隸飛
白行草章草顛草靡不臻妙而尤長於行在前輩中
自有一種風味筆甚勁而姿媚有餘自珍其書以謂
有龍翔鳳舞之執識者不以為過而復推為本朝第
一也論者以謂真行簡劄今為第一正書為第二大
字為第三草書為第四其確論歟

蔡京字元長與襄同郡而晚出欲附名閥自謂為族弟
擢進士第官至太師魯國公以罪徙死博通經史揮

灑篇翰手不停輟性尤嗜書初類沈傳師久之深得
王羲之筆意自名一家評者謂其字嚴而不拘逸而
不外規矩正書如冠劍大人議於廟堂之上行書如
貴胄公子意氣赫奕光彩射人大字冠絕古今鮮有
儔匹襄書為本朝第一而京可與方駕

蔡卞字元度京之弟與兄同年第進士官至檢校少保
謚文正高宗追貶單州團練使自少喜學書初為顏
行筆執飄逸但圓熟未至故圭角稍露自成一家亦

長於大字厚重結密如其為人

米芾字元章初居太原後為襄陽人芾徙吳以母侍宣
仁后藩邸舊恩歷官至禮部員外郎知淮陽軍博文
尚古性好潔世號水滄違世異俗每與人迕人又名
米顛偉岸不羈口無俗語頽然束帶一古君子善屬
文不蹈襲一字崇寧間除書畫兩學博士頗厭士論
又詔作黃庭小楷千文以進旋加褒美大抵書效王
羲之篆宗史籀隸法師宜官晚年出入規矩深得意

外之旨自謂善書者只得一筆我獨有四面識者然
之當時名世之流評其人物以謂文則清雄絕俗氣
則邁往凌雲字則超妙入神然異議者謂其字神鋒
太峻有如強弩射三十里又如仲由未見孔子時風氣
其為論或如此且類多行書世亦罕及

蘇洵字明允號老泉眉州人官至祕書省校書郎贈光
祿寺丞後生望風內謁世稱老蘇先生工書法律不
足氣韻有餘蜀人本不能書元祐間軾始以字畫名

世其流雖出於晉唐其實已濫觴於洵之泉源矣

蘇軾字子瞻號東坡居士洵之子官至端明翰林侍讀
兩學士贈太師謚文忠高名大節照映今古又以翰
墨妙天下少時規模徐浩筆圓而姿媚可喜中年喜
臨顏真卿真行造次為之便欲窮本晚年乃喜李邕
其豪勁多似之黃庭堅云東坡字字可珍委頓人家
蛛絲煤尾敗篋中數十年後當有餅金懸購者又云
東坡書浙東西士大夫無不規模頗有用意精到得

其髣髴至於老年下筆沈著痛快處遂無一筆可尋
蘇轍字子由號穎濱遺老軾之弟與兄同登進士科由
尚書右丞進門下侍郎謚文定書瘦勁可喜風味絕
高真可以兄弟東坡然特少雍容風氣當是捉筆甚
急而腕著紙故耳

黃庭堅字魯直號山谷道人洪州分寧人官至吏部員外
郎工正楷行草楷法妍媚自成一家草書尤奇偉嘗
自云余極喜顏魯公書時時意想為之筆下似有風

氣然不逮子瞻遠甚子瞻為余臨寫魯公十數紙乃
如人家子弟雖老少不類然皆有祖父風骨又云嘗
觀漢時石刻篆韻頗得楷法又云學書三十年初以
周越為師故二十年抖擻俗氣不脫晚得蘇才翁子
美書觀之乃得古人筆意其後又得張長史僧懷素
高閒墨蹟乃窺筆法之妙於禿道舟中觀長年盪漿
羣丁撥擢乃覺少進意之所到輒能用筆

石延年字曼卿本幽州人其祖徙居宋城官至太子中

允祕閣校理跌蕩不羈劇飲尚氣節文詞筆墨照映
流輩正書入妙品尤喜題壁不擇紙筆而得如意初
沿汴而東繫舟泗水龜山下佛祠釋子以題殿榜為
請乃為劇飲卷瓊濡墨作方丈字人以為絕筆異時
范仲淹誅之曰延年之筆顏筋柳骨散落人間實為
神物其為名流推許如此

陸經字子履越人官至集賢修撰善真行書前輩高文
必求經書故經之石刻殆徧天下然多作正書其曲

嚴以規矩自窘譬之推魯如參厚重如勃不失為盛
德君子

王子韶字聖美浙右人官至祕書少監宿學醇儒知古
今方王安石以字書行於天下而子韶亦作字解二
十卷大抵與安石之書相違背喜作正書至於三過
筆真可以挂萬鈞之重蓋其宗褚遂良顏真卿而莫
年自變為一家耳

蘇舜欽字子美號滄浪翁其先世居梓州後為開封人

官至集賢校理監進奏院少慷慨有大志工行草用
筆沈著不凡端勁可愛評書之流謂入妙品當時殘
章片簡傳播天下美其翰墨者有花發上林月澗淮
水之語

蘇舜元字才翁舜欽兄官至尚書度支員外郎為人精
悍任氣節歌詩亦豪健善篆籀亦工草字筆簡而法
足書名與舜欽相後先蓋是下筆處同一關鈕也

王安石字介甫號半山本撫州臨川人後居金陵官至

丞相封荊國公謚曰文退封舒王凡作字率多淡墨
疾書初未嘗略經意惟達其辭而已然而使積學者
盡力莫能到評者謂得晉宋人用筆法美而不夭饒
瘦而不枯瘁黃庭堅云荆公率意而作本不求工而
蕭散閒遠如高人勝士敝衣破履行乎大車駟馬之
間而目光已在牛背矣

劉正夫字德初三衢人登進士第官至少宰贈太師謚
文憲審審有大臣節平日喜學書多作行法好與人

論字所書字間有被旨承命為碑刻者以是傳於世者絕少晚年間作逸字

周越字子發或字清臣淄州人官至主客郎中天聖慶歷間以書顯學者翕然宗之落筆剛勁沈著字字不妄作然而真行尤入妙草字入能也越之家昆季子姪無不能書者亦其所漸者然耶

杜衍字世昌越州山陰人擢進士甲科官至太師祁國公謚正獻廉潔自刻考其大節偉如也好翰墨至暮

年以草書為得意喜與壻蘇舜欽論書韓琦嘗以詩
謝其書云因書乞得字數幅伯英筋骨義之膚其為
當時所重如此史謂正書行草皆有法然以筆迹考
之真行則非所長

于琮毗陵人學隸書學魏受禪碑深得其行筆意

錢俶字文德吳越武肅王鏐之孫文穆王元瓘之子初
元瓘有子曰佐嗣位是為忠獻未幾而俶特以弟繼
其昭穆入朝封秦王謚忠懿方浙右富庶登豐之久

上下無事惟以文藝相高故倣尤喜書善顛草其幹
旋盤結不減古人太宗評其書謂可入神品

錢惟治字和世吳越廢王侁之長子官至檢校太師善
草隸尤好二王書嘗曰心能御手手能御筆則法在
其中矣家藏書帖圖書甚多太宗知之嘗謂近臣曰
錢倣兒姪多工草書因令翰林書學賀正顯詣其第
徧取視之曰諸錢皆效浙僧亞栖之迹故筆軟弱獨
治為工耳

錢惟演字希聖忠懿王俶之子官至同中書平章事謚
文僖文辭清麗於書無所不讀家儲文籍侔祕府書
帖亦平平

錢昱字就之忠獻王佐之長子官至郢州團練使善筆
札工尺牘太宗嘗取觀而賞之

錢易字希白吳越廢王侑之子俶歸朝羣從悉補官易
與兄昆不見錄遂刻志讀書舉進士官至左司郎中
翰林學士倮直未滿卒喜尋丈大字及行草

錢昆字裕之易之兄舉進士官至右諫議大夫以祕書
監老於家能詩書草隸書

錢勰字穆父易之孫風骨明秀如圖畫中人生五歲日
誦千言工正草書正書師歐陽率更草書筆執字體
深造王大令閬域評者以謂可入能品

錢儼字智仁文穆王元瓘養子建隆初領彰武節度如
使相性簡儉書畫皆入能品

章得象字希言世居泉州高祖仕閩遂家浦城官至鎮

安軍節度使同平章事封郇國公謚文簡善正草篆
書晚年逾妙一以魏晉諸賢為則楷法殊類王逸少
然篆則不若真草也

章友直字伯益文簡公得象族子公嘗欲以郊恩奏補
辭不願嘉祐中詔與楊南仲篆石經於大學除將作
主簿亦固辭友直既以此書名世故家人女子亦莫
不知筆法咄咄逼真說者云自李斯篆法之亡而得
一李陽冰陽冰之後得一徐鉉而友直在鉉之門其

猶游夏云米芾評其書云友直書如宮女插花嬾媼對鏡自有一般態度繼其人者誰歟襄陽米芾也

章惇字子厚建州浦城人父兪徙蘇州官至尚書左僕射封申國公作書意象高古莫年一以魏晉諸賢為則此其正書殊類王逸少

陽南仲不知何許人工篆書嘉祐中嘗與章友直篆石經於國子監甚有法度

王著字知微自言唐相石泉公方慶之後世家京兆渭

南祖賁入蜀遂為成都人仕蜀為主簿入朝累遷翰林侍書加殿中侍御史善正書筆迹甚媚頗有家法太宗嘗從學書黃庭堅以謂著用筆圓熟亦不易得如富貴人家子非無福氣但病在韻耳著終侍書而不如學士之名蓋惜之也別有翰林學士王著自是一人

向中正字德元

一作世然

益州華陽人仕蜀為秦武軍節度

掌書記入朝官至屯田郎中精於字學古文篆隸行

草無不工太宗召對訪以書法擢任三館楷法極可
觀

句希仲字衮臣中正子以進士起家官至光祿卿通訓
詁工篆隸能傳其父學

孫思皓皓一作陵國初孫妃弟學歐陽率更書甚得體

李居簡官至贊善大夫直御書院善草書凡章草小草
點畫皆有法太宗甚愛之

王嗣宗字希阮汾州人官至檢校太傅謚景莊工習草

書而不能精

秦觀字少游一字太虛號淮海居士揚州高郵人官至國史院編修官淹該經術書法有東晉風度

張來字文潛楚州淮陰人登進士第官至太常少卿坡門四君子之一人文名滿天下而草書飄逸可觀

郭忠恕字恕先雒陽人仕周為博士入朝太宗素知其名召為國子監主簿能屬文工篆隸而楷法尤精字書忽廢幾於中絕求其如忠恕小楷不可得也

李宗諤字昌武深州饒陽人七歲能屬文以隸書著名而不免於重濁故歐陽修嘗曰書之肥者譬如厚皮饅頭食之未必不佳而世命之為俗物矣此亦有激云爾

張維蜀人始為沙門後反初尤善王書絕得懷素之骨王嗣宗薦之名試御書院維自負其能入院視諸人書不覺微哂衆皆排之止得隸祕閣為楷法不就景德末書鄭州開元寺新塔碑直一時之絕也

鄭文寶江表人官至工部郎中在江南時師徐鉉小篆嘗篆千文以示鉉不出一中指甲鉉嘗曰篆難於小而易於大鄭子小篆李陽冰不及若大篆可兼爾

李無惑同安人官翰林待詔工篆得撥鐙法益勁健端妙世謂無惑書斯冰之後未見其比也

查道字湛然歙州休寧人舉進士第官至右司郎中事母以孝聞喜親筆硯始習篆惠其體執弱有教以撥鐙法仍復鈎用筆經半年始習熟而篆體勁直甚佳

尹熙古

熙一作希

官翰林待詔工篆亦得撥鐙法而所書為

一時之絕

高紳

申革

葛湍皆江東人皆為侍書皆善篆與李無惑同時而弗能及也

王廣微字才叔大名成安人官至龍圖閣直學士小有才而善附會師宋綬作小字有法英宗嘗令書欽明

殿屏

微一
作淵

王臨字大觀廣微弟官至戶部副使負才氣議論不阿
小字師宋綬大字法石延年魁梧擁腫乃以筆力豪
壯為主然獨少古意耳

王壽卿字魯翁陳留人祖擇之之外甥工篆得李陽冰
筆意黃庭堅亟稱其書法云非章友直輩所能管攝
朝廷召至京師使篆字說辭以與王氏之學異後以
命李孝揚而壽卿終身布衣

陳晞

畢仲詢

李孝揚俱工篆與王壽卿同時而不及也

文勛字安國不知何許人官至太府寺丞善論難劇談其篆畫方嚴勁正未嘗妄作一筆蘇軾銘勛字云世人篆字隸體不除如浙人語終老帶吳安國用筆意在隸前汲冢魯壁周鼓秦山

文彥博字寬夫汾州介休人官至左僕射封潞國公諡

忠烈工書黃庭堅云余嘗謂潞公云公書極似蘇靈芝公曰靈芝墨猪耳盖不肯與靈芝爭長今觀到洛為兒子赴許昌帖筆執清勁真不愧古人

韓琦字稚圭相州安陽人舉進士官至右僕射封魏國公謚忠獻後贈魏郡王工正書師顏魯公而頗露芒角

張次位官至殿中丞嘉祐中詔同篆國子石經

陳堯佐字希元其先河朔人後徙閬中官至太子太師

致仕謚文惠少好學善古隸自成一家雖點畫肥重而筆力端勁老猶不衰能為方丈大字謂之堆墨八分凡天下名山勝處碑刻題榜多公親迹世或效之而莫能及也

陳堯咨字嘉謨堯佐弟官至知天雄府贈太尉謚忠肅工隸書

王顧與陳堯佐同時善隸書

楊旼善隸書

林伯修莆田人善大字

胡恢金陵人官至華州推官博物強記善篆隸坐法失官十餘年時韓魏公琦當國恢獻詩自達魏公憐之令篆國子監石經因得復官

歐陽修字永叔號六一居士吉州永豐人舉進士官至參知政事贈太子太師謚文忠幼穎悟過人讀書輒成誦家貧至以荻畫地學書好古嗜學凡周漢以降金石遺文斷編殘簡一切掇拾研稽異同謂之集古

錄因此得古人筆意遺墨流傳道勁可愛人皆寶之
司馬光字君實號涑水先生陝州夏縣人官至右僕射
贈太師封溫國公謚文正正書不甚善隸書極端勁
似其為人黃庭堅嘗跋公書云司馬溫公天下士也
所謂左準繩右規矩聲為律身為度者觀其書猶可
想見其風采

范仲淹字希文其先邠州人後徙江南遂為蘇州吳縣
人舉進士第官至參知政事謚文正內剛外和性至

孝好施子置義莊以贍族人泛愛樂善士多出其門
下善書得樂毅論筆意清勁中有法度但少肉耳

楊億字大年建州浦城人七歲能屬文太宗召試下筆
立成即授祕書省正字官至翰林學士謚曰文正小
楷

王伯忠近臣也善行書

蔡玠官至尚書郎善行書

唐異其處士也善書世稱與李建中相為左右

林逋字君復杭州錢塘人隱居不仕謚和靖先生善行
書筆意殊類李建中而清勁處尤妙

唐詢字彥猷杭州錢塘人官至右諫議大夫讀書好古
尤精翰墨學歐陽詢得其髣髴

唐韶字彥範詢之弟文章氣格高簡疏秀亦善書

唐垌字林夫詢之子熙寧間附王安石官同知諫院學
書知古人筆意少所許可甚愛蘇軾書

李隲字顯夫成都人官至朝散大夫以能書名得真行

草三昧而真草尤勝蘇軾嘗師之

李時雍字致堯號適齋隲之子官至殿中丞工書崇寧間與米芾同為書學博士嘗對御書跨黿二字字方及半宮人以花簪之不覺滿頭於是能聲高壓米芾又嘗以書出外國敕以絳紗封臂不被旨不許輒書能以襟袖濡墨走筆作大字當時士夫碑記多時雍父子之手蓋其結字嫵媚雖乏道勁然亦自成一家李時敏字致道時雍弟官至朝請郎克嗣家聲尤工大

字

邵龢字仲恭丹陽人官至直龍圖閣知蘇州工正行字體清勁

高述丹陽人

潘岐齊安人皆有文藝故其風聲氣格見於筆墨間時作蘇軾簡筆或能亂真遇真識則亦敗矣

文同字可與梓州梓潼人世稱石室先生又自號笑笑先生錦江道人舉進士稍遷太常博士集賢校理知

金陵洋州湖州方口秀眉操韻高潔善篆隸行草飛
白又善畫竹其筆法槎牙勁削如作枯木怪石時自
有一種風味議者謂多縱健而少圓熟

李公麟字伯時號龍眠居士舒州人登進士第官至中
書門下後省刑定官御史檢法好古博雅多識奇字
自夏商以來鐘鼎尊彝皆能考定世次辨測款識聞
一妙品雖捐千金不惜兼綜覽法書故悟古人用筆
意作書有晉人風格清勁而妍麗

薛紹彭字道祖長安人官至祕閣修撰出為梓潼漕自
謂河東三鳳後人書名亞米芾符祐間號能書

江休復字鄰幾開封陳留人官至尚書刑部郎中善隸
書官奉符日嘗至泰山頂視秦所刻石處云石頑不
可鐫鑿不知當時何以刻也其四面無草木而野火
不能及故能若此之久然風雨所剝其存者纔此數
十字而已可以知其嗜好也

葛蘊字叔忱能屬文尤長於詩又特善書或以淡墨塵

紙戲為之假古人之名聞者以傳而人莫能辯也惜其蚤亡不大顯於世

王珣明州鄞縣人熙寧間工篆書證宗要畧三卷命為御書院祇候

周邦彥字美成號清真居士錢塘人官至祕書監尤長於歌詞正書行書皆善

蔣之奇字穎叔官至同知樞密院事亦善書

呂權福唐人元豐間工題署書

閻蒼舒正書雄健而有楷則扁榜尤工

陳歸聖官至祕書丞能篆書尤工徑丈大字

石蒼舒字雖有骨氣而失於麤俗

王升字逸老自號羔羊居士工草書殊有顛轉摺態
度宣和間以草書聖經上進除書錄其書尤為內庭
稱賞

杜從古字唐稽官至禮部郎宣和中與米友仁徐兢同
為書學博士高宗云先皇帝喜書致立學養士獨得

杜唐稽一人餘皆體做了無神氣

李彭字商老其字畫有鍾王之風自言法右軍之瞻麗
用魯公之氣骨獵竒峭於誠懸體韻度於凝式

鄒浩字志完號道鄉先生常州人官至吏部侍郎謚曰
忠元符間任諫爭危言謹論朝野推仰亦善書

陳瓘字瑩中號了翁南劍州沙縣人官至右司員外郎
字畫精勁蕭散有蘭亭典刑

沈遼字叡達號雲巢錢塘人官至太常寺奉禮部以善

書稱王安石曾鞏師其筆法王得其清勁曾得其真
楷登科後游京師偶為人書裙帶詞頗不曲傳達禁
中近幸嬪御服之遂塵乙覽後奪官流永州徙池州
卒

張察字通之成都人嘗帥鼎州以篆名今成都題榜往
往察之筆也

徐琰成都貢士工篆書宣和初嘗書劔南西川四大字
字身長五尺雄偉可喜

吳思孟字醇翁官至知夔州善書

張商英字天覺號無盡居士蜀州新津人官至尚書右
僕射謚文忠長身偉然姿采如峙玉喜草書而不求
工

張唐英字次功商英兄弟進士官至殿中侍御史少攻
苦讀書亦善筆札

趙霆官宣德郎能篆書

孫中官承議郎能草書

鮑慎由官宣德郎能行書

劉瑗官武勝留後能隸書

董儲密人善書蘇軾謂近世亦少其比

劉燾字無言溫陵人以草書名世晚年雖用筆圓熟然
乏秀氣黃庭堅題續法帖云劉燾箋題便不類今人
書使之春秋高江東又出一羊欣薄紹之矣

朱服紹聖元年名試中書舍人上曰服文詞可采書札
亦工

晁迥字明遠世為澶州清豐人徙家彭門官至禮部尚書諡文元性樂易寬簡書法楷正為時推重

葛珣字叔寶紹聖間長於草書

杜介善草書清爽圓媚誠精絕也

雷太簡字簡夫工書自云少年時學王右軍樂毅論鍾東亭賀平賊表歐陽率更醴泉銘褚河南聖教序魏庶子郭知運碑顏太師家廟碑後又見顏行書馬病帖乞米帖苦愛重之但自恨未及其自然近刺雅安

畫卧郡閣因聞平羌江暴漲聲想其波濤番番迅駛
掀搯高下颺逐奔去之狀無物可寄其情遽起作書
則中心之想出筆下矣

翟靜叔能草書嘗有跋米芾游金山龍游寺題名後草
書三行刻之石筆札駸駸逼古人

翟耆年字伯壽能清言工篆及八分

王仲巖字豐父官通議大夫有風采善詞翰

王鞏字定國魏州人工書小草頗有高韻雖不逮古人亦

可傳於世也

范文度能書有模本蘭亭記歐陽修以為蔡君謨以書名當世其稱范君不為誤矣

黃伯思字長睿別字霄賓號雲林子邵武人官至祕書郎天資警敏長於考古正行草隸書皆精初做歐虞後乃規模鍾王筆執簡遠有魏晉風氣尤精小學凡字書討論備盡劉夢得云長睿好古善隸楷法能得古人用筆意

許采字師正吳興人字畫規模鍾王殆窺其妙

陳昱官至寺丞少好學嘗於父伯修枕屏效米芾筆迹
書杜甫詩一日芾過伯修見而驚焉因授以作字提
筆法

趙竦字子立官水曹文章翰墨皆見重於前輩

柳淇學書中興頌筆力雖未絕勁而間架已方嚴矣

李康年字樂道江夏人好古博雅而小篆尤精黃庭堅
謂康年晚寤籀筆下筆自有可喜直木曲銑得之自

然秦丞相斯唐少監陽冰不知去樂道遠近也

杜庭之善書蘇軾云杜庭之書世所貴重

程嗣昌字孺臣中山博野人少喜學書自謂獨得古人用筆之妙嘗評近代能書者曰蘇才翁書筆執遲怯蔡君謨但能模學前人點畫及能草字而已周子發書妙出前輩至於草書殊未得自悟之意古人自悟者惟張旭與余而已

張文正字義祖陰城人自少學書嘗居一小閣上杜門

不治他事積三十年不輟遂以書名神宗評其草書
為本朝第一

吳皖江南人善隸題榜有古意

何籀信安人以隸書知名嘗書上饒令顧君祠記評者
以為非漢人不能為也

袁液字仙夫貴戚子姓而好學趣尚不凡工書

張閱道善真草亦矯然自成一家風範

唐希雅嘉興人書學李煜金錯刀法

慎東美字伯筠工書王逢原贈之詩曰鐵索急纏蛟龍
僵蓋言其字之老勁也

韓璠字景文開封人獻肅公絳之孫風采瓌潤字畫道
媚

杜仲徽作隸書漢隸碑刻歲久風雨剝落故其字無復
鋒鏗仲徽乃用秃筆作隸自謂得漢刻遺法豈其然
乎

仲翼官至太府寺丞善飛白草書

劉次莊字中叟崇寧中為御史有書名工正行草筆法
出王大令褚河南而能兼采羣書為一家行草差劣
卜築於淦水之濱東山之麓所謂戲魚堂是也臨摹
古帖最得其真凡草聖不可讀者以小楷譯之張舜
民評其書謂如紅蓮新折潤之以風雨

潘師旦官尚書郎模刻官帖骨法清勁今絳帖是也

沈文旭大中祥符間為太子右贊善大夫善大字

劉澤閩人善大字嘗書萬安橋三字在海石上徑三尺

許有隼尾存筋之法時蔡襄造橋不自書則澤書可知矣

王惟恭不知何許人工篆嘗與徐鉉等奉詔校定許慎說文行於世

黃公孝仁宗朝官至太常博士有詩名書師王右軍徐易海州人能篆隸

安宜之長安人工楷書

夏竦字子喬江州德安人官至樞密使封英國公進封

鄭國公贈太師中書令賜諡文正以言者改諡文莊
資性明敏多識古文學竒字至夜以指畫膚

晏殊字同叔撫州臨川人官至同平章事諡元獻

包拯字希仁廬州合肥人官至樞密副使諡孝肅

張齊賢字師亮曹州冤句人官至右僕射諡文定

富弼字彥國河南人官至左僕射鄭國公諡文忠

唐介字子方江陵人官至參知政事贈禮部尚書諡質

肅

劉摯字莘老永靜軍東光人官至右僕射謚忠肅

韓絳字子華其先真定靈壽人徙開封之雍丘忠獻公

億之子官至司空檢校太尉致仕康國公

韓維字持國絳之弟官至學士丞旨

石介字守道號徂徠先生兗州奉符人官至太子中允

直集賢院

趙抃字閱道衢州西安人官至參知政事贈太子少師

謚清獻

滕元發字達道東陽人官至龍圖閣學士知揚州謚章敏

楊傑字次公號無為子無為人官至禮部員外郎
賀鑄字方回號慶湖遺老衛州人官至倅太平州

沈括字存中錢塘人官至光祿少卿

毛滂字澤民號東堂元祐中蘇軾守杭日滂為法曹
劉涇字巨濟簡州陽安人官至職方郎中

韓駒字子蒼號牟陽仙井監人官至中書舍人

曾鞏字子固稱曰南豐先生建昌軍南豐人官至中書

舍人

范祖禹字淳甫一字夢得成都華陽人官翰林學士

李之儀字端叔號姑溪滄州無棣人官至通判原州

張舜民字芸叟號浮休居士邠州人官右諫議大夫

蘇幼學字行之温州瑞安人官至中書舍人

劉攽字貢父臨江新喻人官至中書舍人

右自晏殊至此並擅毫翰其蹟雜見羣玉堂法帖中

按帖凡十卷元係安邊所申發朝廷以著庭東廊為
庫架設之榜曰羣玉石刻著作佐郎傅行簡書嘉定
元年三月祕書少監汪遠改建室屋以藏名曰羣玉
堂

宋祁字子京安州安陸人後徙開封之雍丘元獻公庠
之弟官至翰林學士承旨謚景文

呂夷簡字坦夫先世萊州人後徙壽州官至太尉致仕
謚文靖

向敏中字常之開封人官至左僕射謚文簡

邵雍字堯夫其先范陽人徙家河南其居曰安樂窩自號安樂先生嘉祐詔求遺逸留守以雍應詔授將作監主簿後復舉逸士補潁州團練推官皆固辭不受命竟稱疾不之官卒贈祕書省注作郎賜謚康節

楊邦乂字希稷吉州吉水人官至翰林學士謚忠襄

蘇頌字子容泉州南安人徙潤州丹陽縣官至右僕射

贈司空

龐籍字醇之單州武城人官至右僕射謚莊敏

趙挺之字正夫密州諸城人官至左僕射謚清憲

陳靖字道卿興化軍莆田人官至太常少卿

孔文仲字經父臨江新喻人官至中書舍人

胡宿字武平常州晉陵人官至樞密謚文恭

右自宋初至此皆工筆札其蹟雜見鳳墅續法帖中

按帖凡二十卷石刻藏吉州鳳山書院乃曾宏父所

集者

蘇庠字養直號後湖元豐中居廬山名不起胸中本無
軒冕是以風神筆墨皆自蕭散

王曾字孝先青州益都人鄉貢試禮部廷對皆第一官
至左僕射封沂國公謚文正書畫皆合格

王洙字原叔應天宋城人官至翰林學士少聰悟博學
通篆隸書

梁鼎字凝止益州華陽人官至判西京留司御史臺偉
姿貌有介節工篆籀八分

劉筠字子儀大名舉進士官至集賢院學士贈右僕射謚文恭好學有文善筆札

邵必字不疑丹陽人舉進士官至龍圖閣直學士知成都善篆隸

陶穀字秀實邠州新平人官至戶部尚書贈右僕射博通經史及諸子佛老多蓄法書名畫善隸書

鄭諶字本然不知何許人草書有晉光之遺則

吳元輔字正臣并州太原人官至定州鈐轄善筆札

宋湜字持正京兆長安人官至給事中充樞密使諡忠定風貌秀整筆法道媚書帖之出人多傳效

周起字萬卿淄州鄒平人官至知汝州贈禮部尚書諡安惠家藏書至萬卷能書集古今人書并所更體法為書苑十卷弟超官至主客郎中亦能書

蘇易簡字太簡梓州銅山人官至知陳州贈禮部尚書風度奇秀能筆札

趙安仁字樂道河南洛陽人官至御史中丞諡文定生

而穎悟幼時執筆能大字及長善楷隸

高繼宣字舜舉瓊之子家世燕人後居濠州官至眉州
防禦使知讀書工筆札

韓溥京兆長安人官至司門郎中少俊敏縉紳推重之
尤善筆札人多藏其尺牘

姚鉉字寶之廬州合肥人太平興國進士官至起居
舍人京東轉運使雋爽頗尚氣文辭敏麗善筆札

宗翼蔡州上蔡人篤孝恭謹好學強記經籍一見即能

默寫學歐陽虞柳書皆得其楷法

孟玄喆字遵聖西蜀昶子官至泰寧軍節度封滕國公
幼聰悟善隸書

高燾字公垂號三樂居士沔州人篆隸飛白皆造妙

李行簡字易從同州馮翊人中進士第官至右諫議大
夫集賢院學士改給事中家貧刻志於學聚木葉學
書筆法道勁

李瑋字公焰錢塘人尚仁宗女充國公主官至駙馬

都尉平海軍節度使善章草飛白散隸

任誼字才仲洛陽人官至澧州通判隸書學蔡邕

劉松年字榮祖涇之子書學米芾

王逸民永康導江人初為僧名紹祖書學黃庭堅

丁晞顏字令子書畫皆精

滕茂實字秀穎吳人初名宗發政和中擢進士改今名

官至太學正善篆

鍾離景伯字公序善書

鍾離權不知何時人間出接物自謂生於漢而唐呂岩
於吾執弟子禮雙髻跣足睥睨物表自稱天下都散
漢又稱散人嘗草其所為詩字畫飄然有凌雲之氣
非凡筆也亦錄詩寄王鞏多論長生金丹事終自論
其書以謂學龍蛇之狀識者信其不誣

种放字明遠號雲溪醉侯河南洛陽人累拜工部郎中
卒贈尚書書迹有晉人風氣

蒲云漢州綿竹人幼有方外之趣布裘筇竹游山野間

類有道之士尤喜翰墨作正書甚古嘗以雙鉤字寫
河上公注道德經筆墨精細若游絲縈漢孤煙裊風
連綿不斷或一筆而為數字分布勻穩風味有餘覽
之者令人有凌虛之意

張有字謙中吳興人隱於黃冠善篆書法甚古有所撰
復古編行於世張徵云昔人作篆如李丞相李少監
徐騎省皆寫篆非畫篆是故用工至易如神行乎中
至陳晞章友直文勛輩豪洩墨如巧如畫是故筆

癡而無神近世吳興張有用寫篆法神明意用到昔人波瀾復古編出而晞輩廢矣

內臣岑宗曰字子文開封人慶厯初以父遺表通籍壁門然趣向高遠不苟合取容於世故終九品官而無遺恨嘗取古之善書者自漢迄唐凡十有一人為論以評其書曰張芝如班輸構堂不可增減鍾繇如盛德君子容貌若愚語其衆妙足以爭造化者羲之也較其父風但恨乏天機者獻之也世南潛心羲之蓋若

顏子之亞聖徐浩比肩伯儒有類仲由之勇態歐陽
詢得其正故如廟堂衣冠不失動靜柳公權得其勁
故如轅門列兵森然環衛懷素之間逸故翩翩如真
仙真卿之淳謹故厚重如周勃至若李邕則舉動不
離規矩而有虧適通變之道焉此皆其自得於心積
學於外而其吐論所以不愧古人者歟然宗旦作字
尤善行書但銀鉤蠶尾脫去斌媚規模點畫當是蘇
舜欽之亞顧筆力亦窮於此矣

內臣楊日言字詢直開封人喜經史工篆隸八分

荆國大長公主太宗女幼不好弄喜圖史能為歌詩善

筆札

魏國大長公主英宗第二女嫁左衛將軍王詵好讀古

文章工筆札

越國夫人王氏端獻王顥之室作篆隸有古法

和國夫人王氏宗室趙仲輓室能詩章善字畫

徐氏蘊行自號悟空道人臨川蔡教授詵之母學虞世

南書得楷法多手鈔佛書

章氏煎友直之女工篆書傳其家學友直執筆自高壁
直落至地如引繩而煎亦能如其父以篆筆畫棋局
筆筆勻正縱橫如一

徐氏清字靜之蓬萊女官也下西里王氏詩作謝體書
效黃庭堅妍妙可喜陳無已詩云蓬萊仙子補天手
筆妙詩清萬世功肯學黃家元祐腳信知人厄匪天
窮

朝雲字子霞姓王氏錢塘人蘇軾之侍妾敏而好義學
軾楷書頗得其法

英英姓王氏楚州官妓也學顏魯公書蔡襄教以筆法
晚年作大字甚佳梅堯臣贈之詩曰山陽女子大字
書不學常流事梳洗親傳筆法中郎孫妙畫蠶頭魯

公體

楚珍不知姓彭澤娼女草篆八分皆工董史云家藏長
沙古帖標籤皆其題署宣和間有跋其後者曰楚珍

蓋江南奇男子初雖豪放不羣終以節顯吾嘗見其
過湖詩清勁簡遠有丈夫氣故知此人胸中不凡

馬眇徐州營妓也性惠麗蘇軾守徐日甚喜之能學軾
書得其彷彿軾嘗書黃樓賦未畢眇竊效書山川開
合四字軾見之大笑畧為潤色不復易之今碑四字
乃眇筆也

道士陳景元字太虛號碧虛子建昌南城人喜讀書至
老不倦嘗與蔡卞論古今書法至歐陽詢則曰世皆

知其體方而莫知其筆圓卞頗服膺生平不欲草字
惟喜正書大抵祖述王羲之樂毅論黃庭經下逮詢
化度寺碑耳故於古人法度粗已瞻足

道士任玄能江南人工篆

司馬鍊師善大篆及楷

釋法暉政和二年天寧節以細書經塔來上作正書如
半芝麻粒寫佛書十部曰妙法蓮華經楞嚴經維摩
經圓覺經金剛經普賢行法經大悲經佛頂尊勝經

延壽經仁王護國經自塔頂起以至趺坐層級鱗次
不差豪末恍然如鬱羅蕭臺突兀碧落說者謂作此
字時取竅密室正當下筆處容光一點明而不耀故
至細可書然其字累數百萬不容脫落而始終如一
亦誠其心則有是耶

釋希白字寶月號慧照大師長沙人作字有江左風味
慶厯中嘗以淳化閣帖模刻於潭之郡齋

釋穎彬廬山人善王書

釋夢貞闕右人善柳書

釋惠崇壽春人善王書

釋茂蔣廬山人善王書

釋苑基浙東人善顏書

言法華工書蘇軾嘗云僕書作意便彷彿似蔡君謨得意便似楊風子更放則似言法華矣

都錢塘

高宗諱構徽宗第九子善真行草書天縱其能無不造妙

嘗言學書惟視筆法精神朕得王獻之洛神賦六行
置之几間日閱數十過覺於書有所得又言學書必
以鍾王為法然後出入變化李心傳以謂思陵本數
黃庭堅書後以偽豫亦能庭堅書老年間改從右軍
或云初學米芾又輔以六朝風骨自成一家

孝宗諱昚太祖宗派秀王之子入繼大統敷文德求民
瘼明賞罰惜名器書有家庭法度

光宗諱惇孝宗第五子亦能書

寧宗諱擴光宗長子臨下以簡御衆以寬省刑薄賦書
學高宗

理宗諱昀寧宗姪尊尚道學崇重士類其書亦從高宗
家法中來

度宗諱禛理宗姪福王與芮子是時權臣持國帝擁虛
器而已書法體製不失家教

憲聖慈烈皇后吳氏開封人吳宣靖王近之女高宗后
博習書史妙於翰墨帝嘗書六經賜國子監刊石稍

倦即命后續書人莫能辨

恭聖仁烈皇后楊氏寧宗后忘其里氏或云會稽人楊次山者亦會稽人后自謂其兄也少以姿容選入宮頗涉書史知古今書法類寧宗

景獻太子詢燕王九世孫希懌之子官至保寧軍節度使臨川郡王謚莊靖書法學高孝兩朝

趙子畫字叔問宗室也醞藉該洽蓄書近萬卷多所親校過江篆字為第一

趙必宰字伯暉號庸齋宗室也官至秦院宗丞善隸楷
作續書辨妄以規姜夔之失

米友仁字元暉小字虎兒帝之子官至兵部侍郎力學
嗜古善書黃庭堅嘗戲之詩云虎兒筆力能扛鼎教
字元暉繼阿章心畫之妙得於家傳父作子述識者
謂宋之有元章元暉猶晉之有羲之獻之或謂作斜
弩之筆一字皆成橫欹之執此效父體而用心大過

耳

吳說字傅朋錢塘人高宗謂紹興以來雜書游絲書惟
錢塘吳說說知信州日朝辭上謂曰朕有一事每以
自慚卿書九里松牌甚佳向日書易之終不迨卿所
書當令仍舊是日降旨俾根尋舊牌張挂說之見重
於高宗如此

洪适字景伯號半洲鄱陽人官至右僕射謚文惠篤好
漢隸有隸纂隸釋隸韻皆盡漢刻之本末矣

徐兢字明叔號自信居士歷陽人鉉之後自題保大騎

省世家宣和間嘗為書學博士渡江仕高宗朝工篆法以李斯為本張孝伯謂兢書筆力奇古其沈著處不異鑽刻若非豪楮所能成且復陶鎔醞釀變入小篆離析偏旁脗合制字來意縱橫馳騁其用無窮

徐林字稚山兢之兄

徐闕兢之弟並以篆名家

徐巖字子禮號自覺居士林之子工篆隸篆宗家學隸學逢童子碑

張守字全真常州人高宗朝參知政事字畫圓熟流美
世不多見

陳恬字叔易陽翟人為祕書省校書郎後棄官上築
蒿華間號澗上大人能書

王利用字賓王潼川人舉進士第官至夔憲工書畫高
宗特愛其書

汪藻字彥章饒州德興人官至翰林學士博極羣書手
不釋卷工小篆

康與之字伯升號頤菴洪州人南渡初以文辭待詔金馬門學字於陳恬有書傳於世

陸游字務觀號放翁會稽人官至寶章閣待制致仕才氣超邁尤長於詩筆迹飄逸

向子諲字伯恭號薌林清江人官至戶部侍郎書蹟傳世人多寶之

王安中字履道號初寮書法精俊

劉岑字季高能草書縱逸而不拘蓋有自得之趣

薛尚功字用敏錢塘人官至僉書定江軍節度判官廳
事善古篆尤好鐘鼎書有鐘鼎彝器款識二十卷及
鐘鼎韻七卷行乎世

吳琚字居父號雲壑汴人憲聖皇后姪大寧郡王益之
子官至進安節度使進少保謚獻惠世稱吳七郡王
性寡嗜好日臨古帖以自娛字畫類米芾以詞翰被
遇孝宗大字極工

蔣棗字宣卿紹興間戶部侍郎敷文閣待制善行書亦

長於大字皆有韻度得古人用筆意大者徑尺小者如蠅頭怪竒偉麗獨步一時議者以粲書圓媚鎮密然少蕭散

胡世將字承公常州晉陵人官至端明殿學士嘗類集古今石刻為若干卷名曰資古錄所書鐵柱銘刻於延真宮邦人習書多取為楷則

單夔官至侍從倣唐八分方勁有體蓋積習之能非不知而作者嘗師豫章故書迹間有存焉

單煒字炳文號定齋居士沅陵人以武舉得官仕至路
分博學能文於訂考法書尤精字畫道勁得二王法
度

司馬括字子開文正公光之後寓居豫章頗長於隸亦
善行

張孝祥字安國號于湖歷陽烏江人讀書一過目不忘
下筆數刻數千言紹興中廷對第一御覽試策有詞
翰俱美之褒官至顯謨殿直學士篆書極工大字亦

佳楊萬里謂安國書甚真而放

胡程字德輝書學鍾繇

朱昌齡書亦佳

范成大字至能號石湖居士吳郡人擢紹興進士第官
至資政殿大學士少高放以能書稱字宗黃庭堅米
芾雖韻勝不逮而道勁可觀

魏了翁字華甫臨邛人登進士第官至贈太師封秦國
公謚文靖學者稱鶴山先生善篆不規規然繩尺中

而有自然之執嘗以篆法寓諸隸最為近古

魏克愚字明已號靜齋了翁之子亦工篆

關

埜字子文婺州金華人官至端明僉樞密院善楷隸
行草小楷深入率更戶庭大字難為緻密而埜獨有
餘且有位置漕江西日徧易諸處扁榜而以己書張
之

周頌乃益公之後嘗倅洪其書清勁復工扁榜大字

虞似良字仲房號橫溪自稱寶蓮山人吳郡餘杭人官

至監左藏東庫善篆隸隸法尤工家徒四壁藏漢刻
數千本心慕手追盡得旨趣其分析波畫正是偏傍
各有根據大至數尺小至繩頭無不能也亦能古文
奇字

謝諤字昌國號良齋清江人書法似蘇軾而少變其體
大抵窘於舒放然自成一家執筆如捉賊此或近之
楊無咎字補之號逃禪老人又號清夷長者清江人後
寓豫章高宗朝以不直秦檜累徵不起書多率更小

變其體江西碑碣多無咎書小字尤清勁可喜嘗自
題所藏邕禪師塔銘後云予於率更為入室上足
甘叔異字同叔豫章人為人豪放不區區拘引繩墨以
學問稱雄一郡行書學米芾草書學黃庭堅

姜夔字堯章號白石道人番陽人能詩文書法迴脫脂
粉一洗塵俗有如山人隱者難登廟堂嘗著續書譜
一篇以繼孫過庭之作頗造翰墨閭域

杜良臣字子卿豫章人學問該洽以小篆見重一時筆

法精妙考究古學為詳

牟益字德新晚年喜篆書深究古文嘗取詛楚石鼓鐘鼎等文為辨證一編以糾前時釋文之誤

曹士冕字端可昌谷之後博參羣書服膺蘭亭

張即之字溫夫號樗寮歷陽人參政孝伯之子官至直祕閣致仕以能書聞天下特善大字為世所重

陳謙字正仲興化人官至尚書與張即之同時並以書名

劉震孫字長卿號朔齋中州人善大字尤有位置

袁垌字季野豫章人學率更書亦道媚可愛但乏氣骨

耳

張鎡字季萬本北人居滁州善草書

祝次仲字孝友太末人善草書

姚敦字公儀江左人潛心篆學得前古遺意

鄭元秀善隸書

李肩吾字子我號蠙州魏文靖公門人能書取隸楷之

合於六書者作字通行於世

朱熹字元晦一字仲晦徽州婺源人後寓崇安又徙建陽之考亭中紹興進士第官至煥章閣待制贈太師封徽國公謚曰文學者稱之曰晦菴先生熹登第五十年仕於外者僅九考立朝纔四十日簞瓢屢空屢如也善正行書尤工大字嘗評諸家書以謂蔡忠惠以前皆有典刑及至米元章黃魯直諸人出來便自欹斜放縱世態哀下其為人亦然

劉克莊字潛夫號後村興化人官至尚書謚文定書迹亦佳

鄭僑字惠叔號回溪興化人狀元及第官至參知政事贈太師封郇國公謚忠惠善行草著書衡三篇

鄭寅字子敬僑之子官至尚書左司除寶章閣致仕博極羣書留心翰墨作包蒙七卷其略曰伏羲之八卦皆當時之古文也三皇尚忠五帝尚質三王尚文八卦忠也古文質也籀文也籀則王降而霸矣隸其秦

之法令書乎古隸隸之古文也八分隸之猶也楷法隸之篆也飛白八分之流也行楷之行也草楷之走也隸以規為方草則圓其矩而六書之道散矣

米尹仁友仁之弟亦有書名

李昭字晉傑郵城人篆學三墳記甚工

鄭昂字尚明福州人善筆翰嘗撰書史二十五卷

葉鼎字和仲號山澗古括人篆隸皆能書

顏直之字方叔號樂間居士吳人官至中散大夫杜門

不妄交游專意雅尚尤工篆書法度森嚴可以追蹤
徐張嘗手寫集古篆韻二十卷今藏雲間朱芾家

宋棻字文芳錢塘人

刁衍字元賓

杜茂修

高彥字止善梁溪人

陳希愈字師韓

右五人並善書

陳與義字去非號簡齋其先居京兆後遷洛陽官至參知政事

張九成字子韶號無垢居士其先開封人徙居錢塘官至參知政事

晁補之字無咎號歸來子濟州鉅野人舉進士官至禮部郎中

右三人共擅豪翰其蹟雜見羣玉堂法帖中

楊萬里字廷秀吉州吉水人官至江東轉運使贈光祿

大夫高宗嘗為書誠齋二字學者稱誠齋先生

胡安國字康侯號草菴居士建寧崇安人中進士第官

至給事中兼侍讀進寶文閣學士謚文定

胡寅字仲明號致堂安國子擢進士第官吏部侍郎

胡宏字仁仲號五峯寅之弟

鄭清之字德源慶元鄞人登進士第官至左丞相追封

魏王謚忠定

史彌遠字同叔四明人官至左丞相封越王

陳康伯字長卿信之弋陽人官至左僕射封魯國公謚

文恭

闕璘字伯玉古田人舉進士官至太常少卿

李綱字伯紀號梁溪邵武人徙居無錫登進士第官至尚書左僕射贈少師謚忠定

劉子翬字彥冲號屏山建州崇安人贈太師韜之子官至通判興化軍

右十人皆工筆札其蹟雜見於鳳墅續法帖中

楊鎮字子仁號中齋嚴陵人節度使蕃孫之子尚理宗
女周漢國公主官至左領軍衛將軍駙馬都統謚端
孝喜觀圖史書學張即之

鄭縕字天和工篆

葛剛正工篆

畢良史字少童紹興間進士能寫唐人小楷

婁機字彥發嘉興人中乾道進士第官至參知政事深
於書學尺牘人多藏去所著漢隸字源行於世

杜杲字子昕邵武人官至刑部尚書為文麗密清嚴善
行草學急就章

翟汝文字公巽潤州丹陽人官至參知政事風度翹楚
精於篆籀

丁德隅中吳人晉公謂之孫工篆

秦檜字會之江寧人登政和第官至左僕射贈申王謚
忠獻開禧中追奪王爵改謚繆厲能篆書見金陵丈
廟井欄上刻其所書玉兔泉三字亦有可觀雖以一

藝之小善莫掩萬年之遺臭姑存之以為姦臣逆賊
懲

文天祥字宋瑞一字履善吉之吉水人舉進士第一官
至右丞相加少保封信國公體貌豐偉美皙如玉秀
眉而長目忠義名節炳煥史冊善小篆嘗見丹書一
硯後云紫之衣兮緜緜玉之帶兮粼粼中之藏兮淵
淵外之澤兮日宣嗚呼磨爾心之堅兮壽吾文之傳
兮廬陵文天祥書共四十四字筆畫貞勁似其人也

國朝追
諡忠烈

林希逸官至考功員外郎能書子泳亦能篆

樓鑰善大字高宗時太學成奉敕書扁

張安國歷陽人學顏書

顏汝勲字元老官至朝請大夫善筆札

魏宋直號穎峯山人書宗米芾

曲端字平甫鎮戎人官至宣州觀察使諡莊閔端本武

士而知書善屬文長於兵畧作字奇偉

曹松泉天台人攝棗陽倅日穆陵遣賜督府詩字可尺
許曹乃效李陽冰篆作一圖以賀又以古篆文十二
冊為侑皆江南之所未見者古石鼓文尚在卷末
戴侗字復初永嘉人亦能篆有所編六書故行於世
葛長庚自號白玉蟾閩人嗜酒苦吟善草

內臣王介字默菴亦稱能書

劉夫人希字號夫人建炎間掌內翰文字及寫宸翰字
高宗甚眷之亦善畫上用奉華堂印記

楊氏寧宗皇后妹時稱楊妹子書法類寧宗馬遠畫多其所題往往詩意闕涉情思人或譏之

胡夫人自號惠齋居士平江人胡尚書與可女黃尚書子由妻能草書雖未有體法然大書宏放亦婦人所難

翠翹失其姓供內翰侍人字畫媚婉

蘇氏建寧人淳祐間流落樂籍以蘇翠名能八分書

嚴蕊字幼芳天台營妓也善琴奕書畫

田田

錢錢辛棄疾二妾也皆因其姓而名之皆善筆札常代

棄疾答尺牘

釋德止號清谷善屬文尤工正書

釋省肇

一作德肇

廬山人工行書廬山多有所書碑刻

釋思齊杭人書師柳公權有所書放生池碑在杭州

釋仁濟字澤翁書師蘇軾

釋從宥字世踈長沙人以草聖為世所稱

釋子溫字仲言號日觀居錢塘瑪瑙寺人但知其畫葡萄而不知其善草書也其所畫葡萄枝葉皆草書法也

書史會要卷六